

# In cler Na a la politica da famiglia statala

Votaziun federala dals 3 da mars 201

DA LUCAS DEPLAZES / ANR

■ In comité cun exponents da la Partida populara e da la Partida liberal-democrata ensemen cun l'Unìun d'artisanadi e mastergn ha preschentà ier a las medias ses arguments cunter l'iniziativa davart la politica da famiglia statala che vegn en votaziun ils 3 da mars proxim. Per la Partida populara svizra (pps) è l'argumentaziun dal cussegl federal en sias explicaziuns per la votaziun dals 3 da mars confusa. D'ina vart punctueschia il cussegl federal la muntada da la midada e da l'autra vart constateschia el che l'iniziativa na portia betg grondas midadas. Deplorablmain na possia nagin inditgar ils custs per la confederaziun e per ils chantuns. Tenor il parairi dal comité vegnia la midada a custar milliardas a la confederaziun, als chantuns ed a las vischnancas.

Nadja Pieren, cussegliera naziunala (pps/BE) che ha sezza gronda experientscha sin il sectur da la tgira d'uffants pitschens, ha deplorà che la lavur da la parentella sco per exempel da las tattas vegnia ignorada. Sco quai che in studi demussia vegnian 70% dals uffants pitschens tgrads da las tattas durant almain 2 dis l'emna. In ulteriur novissim studi da l'Universitad da Friburg fa attent che la tgira da confamgliars vegnia sutvalitada. Pieren è da l'avis che la responsabladad per la tgira dals uffants stoppia restar en la responsabladad dals geniturs. Ils geniturs san meglier ch'il stadi tge che lur uffants basegnan. Uschepert ch'ins surdat talas incumbensas al stadi vegn fatg pretensiuns e prescripziuns che custan ina massa, ha ella con-



Jean-Hugues Busslinger, directur Politic Centre Patronal Lausanne, Filippo Leutenegger, cusseglier naziunala pld/ZH, Nadja Pieren, cussegliera naziunala pps/BE e Hans-Ulrich Bigler, directur Unìun svizra da mastergnants (da sanester) han preni posiziun davart l'artigel da famiglia.

KEYSTONE

statà durant sia pratica. In ambient me-mia clincic na saja betg en l'interess dals uffants, ha ditg Pieren. Ella refusa consequentmain che la confederaziun prescriviva il model da famiglia.

Cusseglier naziunala Filippo Leutenegger (pld/ZH) ha crititgà che la politica volvia enturn la chaussa. En quest cas

mettia la politica naziunala la purschida avant che conuscher ils vairs basegns da tgira. La confederaziun stuess surpigliar la responsabladad per la tgira dals uffants. Quai muntia er ina delegaziun da las cumpetenzas dals chantuns a la confederaziun. Senza necessitad prendia davent l'iniziativa la responsabladad da las

famglias, quai che vegnia er ad avair consequenzas finanzialas per ils pajataglia. Quai saja la fallada via da surdar adina dapli incumbensas al stadi cun il resultat da provocar adina dapli burocracia e dapli custs. Leutenegger ha er admonì als custs dal nov artigel costituziunala che vegnia ad avair grevas consequenzas

finanzialas. Diversas calculaziuns demussian ch'ils custs pon ir en milliardas francs.

Il directur da l'Unìun d'artisanadi e mastergn, Hans Ulrich Bigler, ha sincerà che las interpresas sa stentian da procurar per bunas cundiziuns da lavur che lubeschian da cumbinar l'activitad da gudogn cun las obligaziuns da la famiglia. El ha dentant tema che en l'avegnir vegnian las interpresas pitschnas e me-saunas sfurzadas da metter a disposiziun quotas fixas da posts da lavur per las mamas u models da lavur prescrits dal stadi.

## Ils parairis en dividids

L'iniziativa davart la politica da famiglia vegn or da la cuschina da la Partida cristiandemocratica (pcd), numnadain da ses anteriur cusseglier naziunala Norbert Hochreutener. Quai po er esser – dasper il fatg che Lucrezia Meier-Schatz è gestunaria da Pro Famiglia – il motiv che la pcd sustegna quasi unanimain l'iniziativa. Sche ses votants vegnan a suandar quest curs è intschert.

La sanestra ed ina part da la Partida liberaldemocrata (pld) sustegnan era la midada da la costituziun federala. La Partida populara svizra (pps) refusa l'iniziativa consequentmain – ensemen cun l'Unìun d'artisanadi e da mastergn.